



## Projek Kilauan Mutiara bantu sekolah kluster kecemerlangan

Oleh: ASRAF AHMAD DAN NOR 'AISYATUL SAKINAH BAHARUDIN

Hubungan baik menerusi Inisiatif Sekolah Kluster Kecemerlangan dan Universiti Malaysia Pahang (UMP) terus diperkasa melalui pelaksanaan Projek Kilauan Mutiara kelolaan Jabatan Hal Ehwal Akademik & Antarabangsa (JHEAA) dengan kerjasama membabitkan tenaga fasilitator mahasiswa Kelab In-Smartive Universiti Malaysia Pahang (UMP) di Sekolah Kebangsaan (SK) Bandar Temerloh, Pahang pada 17 September 2015 yang lalu.

Dengan fokus terhadap pemerkasaan kecemerlangan penguasaan bahasa Melayu, projek sehari itu melibatkan penyertaan 100 pelajar Tahun 5 sekolah tersebut dengan bimbingan 13 fasilitator mahasiswa di bawah seliaan Guru Bahasa Melayu di Pusat Bahasa Moden & Sains Kemanusiaan (PBMSK) UMP, Jamilah Bebe Mohamad yang berperanan sebagai mentor utama projek.

Menurut Pengurus Projek yang juga mahasiswa Tahun 2 Fakulti Kejuruteraan Kimia & Sumber Asli (FKKSA), Muhammad Na'im Kamaludin, 19, projek ini merupakan inisiatif sulung kesukarelawan pendidikan (*edu-volunteerism*) In-Smartive sejak Penasihat Kelab ini, Wan Nazrul Helmy Wan Mohd Zain dilantik sebagai Ketua Mentor Kluster

Kemasyarakatan dan Pengantarabangsaan Inisiatif Sekolah Kluster Kecemerlangan-UMP baru-baru ini.

"Walaupun ini merupakan pengalaman pertama kami mengendalikan modul bahasa Melayu, namun para fasilitator telah menjalani program latihan dan simulasi bersama mentor utama sebelum pelaksanaan sebenar bagi memastikan keberkesanannya kepada para penerima manfaat," tambah Muhammad Na'im lagi.

Tambahnya, sebagai sekolah kluster bagi kebitaraan bahasa Melayu, modul yang direka bentuk bagi SK Bandar Temerloh memfokus kepada pendedahan sejarah dan pemupukan minat terhadap bahasa Melayu dengan pelaksanaan modul seperti ialah S.A.L.A.M, Warkah Anakanda dan Kenali Bahasa Kita.

Hadir merasmikan majlis penutup ialah Guru Besar, Sekolah Kebangsaan Bandar Temerloh, Raja Ibrahim Raja Deraman yang berharap supaya kerjasama ini dapat diteruskan secara lestari pada masa akan datang.

Hadir sama ialah Guru Penolong Kanan Hal Ehwal Murid, Rosenariana Ismail, Guru Penolong Kanan Kokurikulum, Hamzah Mat

Salleh dan Wakil Penasihat In-Smartive, Mohamad Eliyass Jamaruppin.

